



Broj, 01-07-10-51-227/2024  
Sarajevo, 11.10.2024. godine

Na osnovu člana 25. stav (1) u vezi sa članom 26. stav (4) Zakona o slobodi pristupa informacijama na nivou institucija Bosne i Hercegovine ("Službeni glasnik BiH", br. 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Todorović Igora [REDACTED], od 08.10.2024. godine, predsjednik Visokog sudskog i tužilačkog vijeća Bosne i Hercegovine donosi

## RJEŠENJE

**Odobrava se** zahtjev za pristup informacijama ustupanjem tonskog zapisa sa sjednice Vijeća, održane 25. i 26. septembra 2024. godine, u dijelu raspravljanja i odlučivanja o imenovanju na poziciju sudije Suda Bosne i Hercegovine.

## Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je 09.10.2024. godine zaprimilo zahtjev Todorović Igora [REDACTED] (u daljem tekstu: podnositelj zahtjeva), za pristup informacijama kojim je tražen transkript ili audio zapis sa sjednice Vijeća održane 25. i 26. 09.2024.godine u dijelu koji se odnosi na imenovanje sudije Suda BiH. Podnositelj zahtjeva navodi da je na sjednici VSTV-a BiH za sudiju Suda BiH imenovan D [REDACTED] K [REDACTED] koji je bio drugi na rang listi i gdje on, kao kandidat predložen od strane nadležnog podvijeća i najbolje rangirani kandidat, nije dobio potreban broj glasova za imenovanje.

Kako podnositelj zahtjeva ima namjeru koristiti svoje pravo da protiv rješenja o imenovanju pokrene upravni spor pred Sudom BiH, a za što ima rok od samo 8 dana, zahtjeva da mu se transkript ili audio zapis dostavi u najkraćem mogućem roku.

Predmetni zahtjev, iako se podnositelj u formalnom smislu ne poziva na svoje pravo utemeljeno Zakonom o slobodi pristupa informacijama na nivou institucija BiH (ZOSPI), ispunjava uslove iz odredbe člana 23. stav (3) ZOSPI-a, koja utvrđuje nužni sadržaj zahtjeva za pristup informacijama te se, stoga, ima smatrati zahtjevom u smislu ZOSPI-a.

Razmatrajući predmetni zahtjev, u skladu s nadležnostima VSTV-a BiH, utvrđeno je da VSTV BiH posjeduje podatke navedene u izreci ovog rješenja, te da omogućavanje pristupa istim nije protivno odredbama Zakona o slobodi pristupa informacijama na nivou institucija Bosne i Hercegovine.

U kontekstu obima navedenog zahtjeva koji je alternativno postavljen, nužno je naglasiti da Vijeće ne sačinjava transkript sa sjednice, nego zapisnik (odredba člana 32f. Poslovnika VSTV-a BiH) koji se usvaja na narednoj sjednici Vijeća, konkretno u ovom slučaju, biće predmet razmatranja na sjednici Vijeća zakazanoj za 16. i 17. 10.2024. godine. Sjednice Vijeća se u skladu sa članom 32. Poslovnika („Službeni glasnik BiH“, br. 55/13, 96/13, 46/14,

61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24 i 27/24) snimaju a tonksi zapisi se čuvaju u Sekretarijatu i nisu dostupni javnosti.

Imajući u vidu član 42. Zakona o VSTV-u BiH („Službeni glasnik BiH“, br. 25/04, 93/05, 48/07, 15/08, 63/23, 9/24 i 50/24) kojim je propisano da *svaki kandidat ima pravo pregledati svoj prijavni materijal dostavljen Vijeću, koji se tiče njegove prijave, zahtijevati i dobiti obavještenja, pod uslovom da se ne radi o povjerljivim podacima, u vezi sa prijavom i postupkom imenovanja, pregledati i dati svoje komentare na mišljenje o kandidatu koje je dostavljeno Vijeću, i uputiti Vijeću komentare u vezi sa pitanjima koja utiču na prijavu kandidata* kao i član 32. Poslovnika VSTV-a BiH kojim je propisano da *Vijeće može donijeti odluku da zainteresovanim licima, na njihov zahtjev, ustupi dio tonskog zapisa za koji postoji izražen interes javnosti, Vijeće je razmatralo dostavljeni zahtjev.*

Predsjednik Vijeća donio je dana 10.10.2024. godine odluku br. 08-07-2-3663-1/2024, o provođenju elektronskog/telefonskog glasanja imajući u vidu činjenicu da je prva naredna sjednica Vijeća zakazana za 16. i 17. oktobar 2024. godine, kao i hitnost postupanja po zahtjevu.

Nakon provedenog glasanja Vijeće je dalo saglasnosti na ustupanje tonskog zapisa sa sjednice Vijeća, održane 25. i 26. septembra 2024. godine, u dijelu raspravljanja i odlučivanja o imenovanju na poziciju sudije Suda Bosne i Hercegovine.

U prilogu Vam ovim putem dostavljamo CD sa tonskim zapisom u skladu sa dostavljenim zahtjevom.

Postupajući po zahtjevu podnosioca, uzimajući u obzir sve gore navedeno, odlučeno je kao u dispozitivu ovog rješenja.

#### **Pouka o pravnom lijeku:**

Protiv ovog rješenja podnositelj zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositelj žalbe ima pravo pokrenuti upravni spor pred Sudom Bosne i Hercegovine zbog šutnje administracije.



Dostavljeno:

1. Podnosiocu zahtjeva
2. Odjelu za imenovanje i napredovanje
3. Odjelu za pravna pitanja
4. U spis

Prilog:

1. CD sa tonskim zapisom sa sjednice Vijeća, održane 25. i 26. septembra 2024. godine, u dijelu raspravljanja i odlučivanja o imenovanju na poziciju sudije Suda Bosne i Hercegovine.